

四庫全書

經部

欽定四庫全書

經部  
周禮纂訓卷八

詳校官監察御史<sub>臣</sub>施朝幹

刑部郎中<sub>臣</sub>許兆椿覆勘

總校官編修<sub>臣</sub>王燕緒

校對官待詔<sub>臣</sub>胡士震

謄錄監生<sub>臣</sub>伍上擢

欽定四庫全書

周禮纂訓卷七

安溪李鍾倫撰

遺人掌邦之委積以待施惠鄉里之委積以恤民之難  
阨門閭之委積以養老孤郊里之委積以待賓客野鄙  
之委積以待羈旅縣都之委積以待凶荒

遺唯季反  
劉音遂

注委積者廩人倉人計九穀之數足國用以其餘共  
之所謂餘法用也少曰委多曰積鄉里鄉所居也難

既猶困乏也門關以養老孤人所出入易以取餽廩也

疏門國門關關門出入皆有稅所稅多少足國用  
外留以養老孤郊里六鄉之民出居郊者以待賓  
客者賓客至郊因即與廩餽野鄙據六遂遂中有  
五百家鄙以待羈旅者甸在二百里中外內有羈  
旅皆得取之不見稍者縣都中兼之特於此三處  
見凶荒者凶荒畿外畿內皆有畿外凶荒則向畿

內取之畿內凶荒則向畿外取之故於近畿三百里外言待凶荒也案倉人文若穀不足則止餘法用謂鄉里已下皆無入委積之事雖無新物以入委積其舊委積則給難阮老孤之等故又云藏之以待凶而頒之

凡賓客會同師役掌其道路之委積凡國野之道十里有廬廬有飲食三十里有宿宿有路室路室有委五十里有市市有候館候館有積

注候館樓可以觀望者也市有三廬一宿

疏三廬一宿者十里二十里廬三十里宿四十里廬五十里市是市有三廬一宿也

凡委積之事巡而比之以時頒之

疏凡委積謂上二文也以時頒之則以待者是也訓國野之道總上文國用之餘以為委積施惠於此乎取賓客會同師役於此乎供也巡而比之恐有虛冒盜竊也

均人掌均地政均地守均地職均人民牛馬車輦之力  
政

注政讀為征地征謂地守地職之稅地守虞衡之屬  
地職農圃之屬力征人民則治城郭涂巷溝渠牛馬  
車輦則轉委積之屬

疏均人總均畿內鄉遂及公邑土均掌平邦國都  
鄙

凡均力政以歲上下豐年則公旬用三日焉中年則公

旬用二日焉無年則公旬用一日焉

注豐年人食四鬴之歲也人食三鬴為中歲人食二鬴為下歲歲無贏儲也公事也旬均也

疏此即人民之力政不通牛馬車輦故王制云用民之力歲不過三日

凶札則無力政無財賦

疏此即廩人不能人二鬴之歲訓財賦即九功之稅以其皆任民之事故從力政為類上文不言均



財賦者任地乃可言均貢其所有無定則故不言均也

不收地守地職不均地政

注不收山澤及地稅亦不平計地稅非凶札之歲當收歲乃均之耳

三年大比則大均

注有年無年太平計之若久不修則數或闕

師氏掌以嫪詔王以三德教國子一曰至德以為道本

二曰敏德以為行本三曰孝德以知逆惡教三行一曰孝行以親父母二曰友行以尊賢良三曰順行以事師

長

嫩音美行  
下孟反

注德行內外之稱在心為德施之為行孝在三德之下三行之上德有廣於孝而行莫尊焉國子公卿大夫之子弟師氏教之世子亦齒焉學君臣父子長幼之道訓至德者極深通微智之事也敏德者果銳奮發勇之事也孝德者愷悌慈祥仁之事也入道以智

為先故至德以為道本所行以養而立故敏德以為  
行本人能孝悌則無犯上作亂之事故孝德以知逆  
惡知猶辨也辨其逆惡者孝順者亦辨之矣友行本  
所以親兄弟而亦可以尊賢良故繼孝行之後而在  
順行之先也至德敏德曰本者以為異日道行之本  
也 此段須再詳與下小學之說頗牾 至德者收  
放心養德性全其純一之本

居虎門之左司王朝

注虎門路寢門也王日視朝於路寢門外畫虎馬司  
猶察也察王視朝若有善道可行者則當前以詔王  
掌國中失之事以教國子弟

中鄭下  
仲反

注教之者使識舊事也中中禮者也失失禮者也

疏國子弟謂王太子以下及王庶子諸侯以下皆  
以適子入國學庶子不入訓掌國中失不必拘謂  
王朝之時而有中失凡國家之禮如何而中如何  
而失皆以教子弟也

凡國之貴遊子弟學焉

注貴遊子弟王公之子弟遊無官司者訓此語結上  
非謂國子弟之外又有一輩貴遊子弟也蓋以下文  
所言又非教國子事故結之如此經中文法多有之  
且又以明庶人之子不與也

凡祭祀賓客會同喪紀軍旅王舉則從

注舉猶行也

疏祭祀則郊廟及山川社稷賓客來朝聘或在朝

或在廟會同或在畿內或在畿外從王所在以媼

詔王

聽治亦如之

注謂王舉於野外以聽朝

疏王所在皆有朝以聽治亦如之者亦如居虎門  
之左

使其屬帥四夷之隸各以其兵服守王之門外且蹕

蹕音

畢

注兵服旃布弓劍不同也門外中門之外蹕止行人  
不得迫王宮也

疏其屬謂師氏屬官上士已下兵服者東方南方  
其服布其兵劍西方北方其服旃其兵弓

朝在野外則守內列

注內列蕃營之在內者也其屬亦帥四夷之隸守之  
如守王宮

保氏掌諫王惡而養國子以道乃教之六藝一曰五禮

二曰六樂三曰五射四曰五馭五曰六書六曰九數乃  
教之六儀一曰祭祀之容二曰賓客之容三曰朝廷之  
容四曰喪紀之容五曰軍旅之容六曰車馬之容

馭音御

注養國子以道者以師氏之德行審諭之而後教之  
以藝儀也五禮吉凶賓軍嘉也六樂雲門大咸大磬  
大夏大濩大武五射白矢參連剡注襄尺井儀也五  
馭鳴和鸞逐水曲過君表舞交衢逐禽左六書象形  
會意轉注處事假借諧聲九數方田粟米差分少廣



商功均輸方經贏不足旁要今有重差夕桀勾股也  
祭祀之容齊齊皇皇賓客之容穆穆皇皇朝廷之容  
濟濟翔翔喪紀之容纍纍顛顛軍旅之容暨暨詒詒  
車馬之容匪匪翼翼

疏五射已下無正文或以義言之白矢者矢貫侯  
見其鏃白參連者三矢連續而去剡注者羽頭高  
鏃低去剡剡然襄尺者臣與君射襄君一尺而退  
井儀者四矢貫侯如井之儀云五馭鳴和鸞者和

在式鸞在衡升車馬動則鸞鳴和應也逐水曲者車隨水勢屈曲而不墮水也過君表者即穀梁傳云置旃以為轅門是也舞交衢者謂車在交道車旋應於舞節逐禽左者謂馭驅逆之車驅禽獸使左當人君以射之云九數又有重差夕桀勾股者此是漢法今或以勾股代旁要則是一也訓案過君表即轅門者田獵時仰轅為門以旃表之中容一車兩旁只餘四寸御拙者則車擊而不得入故

取為馭之善者也

凡祭祀賓客會同喪紀軍旅王舉則從聽治亦如之使其屬守王闈

注闈宮中之巷門

疏師氏居中門外保氏守王闈訓古之教者有鄉學有國學有小學有大學鄉學之別有二而小學不與焉國學之別有三而小學不與焉周兼四代之制其命學不一名是故鄉立庠則有虞氏之庠

也州黨及遂立序則夏后氏之序也皆大學也此鄉學之別二也古者合二十五家而為之門門側之堂謂之塾上老坐於右塾庶老坐於左塾閭里之子弟皆就學焉是鄉之小學即二十五家之塾也國學之制成均居中瞽宗在西東膠在東成均亦曰辟雍瞽宗即右學亦曰西學東膠即東序亦曰太學成均頌學政右學祀學祖東膠養老更記曰祀先賢於西學經曰祭於瞽宗皆右學也記曰

有司卒事適東序設三老五更之席又曰食三老  
五更於太學又曰養國老於東膠皆東學也三學  
皆建於國中此國學之別三也此外尚有虞庠在  
國之西郊是為小學則天子之元子衆子公卿大  
夫元士之適子八歲以上皆入學焉蓋國之子弟  
不可與庶民同學於家塾記曰天子設四學并小  
學而言成均掌教大學其師則大司樂也其弟子  
則王公之子弟及凡民之俊秀也虞庠掌教小學

其師則師氏保氏也其弟子則惟貴遊子弟而庶人之子不與也是以師保之官其教甚約師以德行為先保以文藝為業故師氏之教三德也而曰以為道本以為行本本之言也將為他日之基焉耳保氏所教六藝惟舉其數蓋少之時但能使之識其器物方名至於中和祇庸孝友之旨興道諷誦言語之林聲音節奏之備未能及焉非小學而何或曰天子小學在郊而師氏居虎門之左何也

彼固曰司王朝也其非朝則在學矣師也者以德  
行觀焉者也進有匡君之容退則為子弟之望所  
謂以身教者不待其訓戒之煩也保氏以藝為事  
則欲使之安其業而親其師故不同也

附周官學校論曰古之教者有鄉學有國學有小  
學有大學鄉學之別二而小學不與焉國學之別  
三而小學不與焉周兼四代之制其命學不一名  
是故州黨及遂立序則夏后氏之序鄉立庠則有

虞氏之庠序以飲燕習射庠以賓興賢能鄉射舉  
於春秋賢能興於三年皆大學也此鄉學之別二  
也古者合二十五家而為之門門側之堂謂之塾  
大夫士仕焉而已者教焉閭里子弟皆往就學然  
則鄉之小學即二十五家之塾也國學之制成均  
居中瞽宗在西東膠在東馬氏曰成均五帝之學  
周亦謂之辟雍瞽宗殷之右學周亦謂之西學東  
膠夏之東序周亦謂之大學成均頒學政瞽宗祀



學祖東膠養老更記曰祀先賢於西學又曰命有司行事祭先聖先師經曰祭於瞽宗皆殷之右學也記曰有司卒事適東序設三老五更之席又曰食三老五更於太學又曰養國老於東膠皆夏之東序也然則三學並建於國中皆大學也此國學之別三也此外尚有虞庠在國之西郊是為小學記曰天子設四學并小學在焉成均掌教大學其師則大司樂也其弟子則王公子弟十五以上及

凡民之俊秀賓於鄉者皆入學也虞庠掌教小學其師則師氏保氏也其弟子則王公子弟八歲以上皆入學而庶人之子不與也同之於大學所以一其道德別之於小學所以異其尊卑或曰師保之教甚精而約而反以為小學何也曰師氏之教三德曰以為道本以為行本本之為言也將為他日之基焉耳保氏所謂六儀者今見於少儀之篇蓋亦小學之事且夫太學之內自天子之子以及

凡民之俊秀無不入學而師氏所教惟有貴遊子弟蓋國之貴胄不可與庶人子同學於家塾而庶人之子又以其童稚而未閑於動作禮義故不得進而與公卿之子同學此所以與太學異也或曰天子小學在郊而師氏居虎門之左何也曰王朝則居虎門退朝則在西郊或曰然則師保之官何以不附於大司樂曰小學在近郊之內六鄉之地故從鄉官之後而屬於司徒各以類而已矣或曰

樂師教國子小舞則是掌教小學者樂師也何以  
言師氏保氏曰審音蓋有專官非師保所能兼是  
以其官隸於司樂耳或曰然則鄉之大學何師曰  
當亦大夫士之致仕者為之何以知之大司樂中  
大夫也樂師下大夫也師氏中大夫也保氏下大  
夫也是皆官同然則大夫士之致仕者教於家塾  
而不教於庠序哉或曰大學之中惟天子之元子  
衆子得俱入學自公卿而下至於元士惟適子入

學而庶子不入夫民之俊者猶得與王子齒讓於  
學宮之中而卿大夫之子反不得預何也且當在  
小學時適子庶子將亦異其學耶先王之世工商  
而外無不人人知學又豈有卿大夫之子而更不  
學哉曰古者周天子之官有庶子官職公卿大夫  
之庶子居則使之宿衛王宮是官伯之所比也有  
事則治之以軍法惟太子之所用也至其教之之  
方則春考之於大學秋肄之於射宮皆庶子之職

而非大司樂之司此先王所以厚別適庶也夫適  
子之成材者其後日將有御大夫之事焉固先王  
之所重矣若夫庶子者則亦養之於修德學道之  
科習之以車甲卒伍之法寄之以宿衛徒役之令  
其人蓋皆在王左右輔相太子周家之綴衣虎賁  
僕右侍御罔匪正人由此其選也孰謂其輕之哉  
師氏掌教貴遊子弟蓋統適庶而為言者也其言  
貴遊所以別於氓庶焉耳 三德三行論曰師氏

掌教三德一曰至德以為道本二曰敏德以為行  
本三曰孝德以知逆惡何謂也曰收放心養德性  
之務也其曰三行一曰孝行以親父母二曰友行  
以尊賢良三曰順行以事師長何謂也曰此入孝  
出弟之節也皆小學也或曰朱子之言曰至德者  
誠意正心端本清源之事道則天人性命之理事  
物當然之則修身齊家治國平天下之術也敏德  
者強志力行畜德廣業之事行則理之所當為日

可見之迹也孝德者尊祖愛親不忘其所由生之事知逆惡則以得於己者篤厚深固有以真知彼之逆惡而自不忍為也此以大學言之也今以為小學則小學之所謂至德敏德孝德者何也且其曰道曰行又將何所指與曰至德者純一無偽得之最初故曰至道則率性是也敏德者朝興夕寐執事有恪行則踐履之實強勉力行之謂孝德者溫柔恭儉無驕恃力專言孝而遜弟仁愛皆兼之



逆惡者孝德之反也既曰德矣其教之奈何曰捍  
其外誘以全其真純則至德不雜於外物矣儆其  
昏怠不使荒嬉成性則敏德不墮於姑息矣養以  
愷悌以察其所安而施化則孝德不流於強戾矣  
何以言乎本也曰至德全而有以為察識擴充之  
地故曰以為道本敏德全而有以為弘毅勇敢之  
基故曰以為行本孝德全而預遠夫犯上作亂之  
漸故曰以知逆惡何以言乎知逆惡也過於已然

之謂禁察於未然之謂知小學者豫之道也其以  
孝德知之奈何示之禮讓之法以觀其習便也教  
之孝弟之義以觀其不犯命也孔子於互鄉闕黨  
之童子是也然則於至德敏德言本而孝德不言  
本何也曰道與行非小學所可猝全故養厥德以  
俟之若夫孝弟之節小學日習之而逆惡之萌又  
非可一日潛滋此不可以本言者然則曰養孝德  
以為仁民愛物之本不亦可乎曰逆惡去而仁愛

全矣有子以孝弟為行仁之本固以犯亂之胥遠  
言仁也曰此之言本異於朱子何與曰姑就一隙  
之明而誌之耳朱子之言本也蓋言立乎此而生  
乎彼之為本也似以內外言之者也此之言本也  
言豫乎此以待夫彼之為本也以今日異日言之  
者也竊意若果以內外言之則孝德亦當以內外  
言之則何不曰孝德以為愛本而曰以知逆惡也  
且夫知之為言也與其以學者之自知之竊謂不

若以教者之知之之切也況朱子亦嘗以三行為小學之事矣似於義無傷也三德之序則曷取爾曰克至德者可以聞道聖賢之事也勵敏德者可以廣才成人之業也敦孝德者可以立本篤行之儒也至德自能兼敏與孝而孝或不能以兼敏孔子答子貢問士而及其次是也若夫以其分言之則至德智也敏德勇也孝德仁也勇次於智而仁後者偏言之仁也有淳厚之美質而加以智勇則於

道又何難哉三行之序孝行以親父母固也友行以尊賢良順行以事師長何與曰友行雖所以尊賢良而亦所以親兄弟但友本屬兄弟之義直曰兄弟則疑不足以該賢良曰賢良則兄弟之義固自著也故先友而後順以親逮疎也曰師氏教以德行不及文學何也曰三德三行源本之事也師氏教之六藝六儀枝葉之事也保氏教之各有取耳蓋有源本以檢束身心有枝葉以涵泳情性此

養蒙之具而聖功在其中矣鄉三物之教蓋大學也其法亦如之文貞公批後曰吾意謂至德者立敬存誠涵養德性之事中庸所謂尊德性是也故曰以為道本言窮理修身皆以是為本也敏德者學問思辨之事書所謂遜志務時敏孔子所謂好古敏求所謂道問學是也故曰以為行本蓋學問思辨乃篤行之本也孝德者入孝出弟中庸所謂誠身順親思修身不可以不事親是也以知逆

惡者言其能推以及人知犯亂之所由而有以得  
夫化民成俗之要蓋至此則修身之事盡而齊治  
均平之術得言知逆惡猶之乎言為治本也

癸酉  
夏六

記

司諫掌糾萬民之德而勸之朋友正其行而強之道藝  
巡問而觀察之以時書其德行道藝辨其能而可任於

國事者

強其  
文反

注朋友相切磋以善道也巡問行問民間也可任於

國事任吏職

疏德行道藝此萬民時所習即大司徒所云以鄉  
三物教萬民者注云吏職者謂比長閭胥族師之  
類

以考鄉里之治以詔廢置以行赦宥

注因巡問勸強萬民而考鄉里吏民罪過以告王所  
當罪不訓書其德行道藝以待賓興而舉之於鄉大  
夫可任國事兼出使長之入使治之上節是考萬民



之事鄉里之治是考治民者之事

司救掌萬民之衰惡過失而誅讓之以禮防禁而救之

救如字劉音  
拘衰似嗟反

注衰惡未麗於罪者過失亦由衰惡麗於罪者誅責也古者重刑且責怒之未責罪也

凡民之有衰惡者三讓而罰三罰而士加明刑恥諸嘉石役諸司空

注罰謂撻擊之也加明刑者去其冠飾而書其衰惡

之狀著之背也嘉石朝士所掌在外朝門左使坐焉  
以恥辱之

其有過失者三讓而罰三罰而歸於圜土

注圜土獄城也過失近罪晝日任之以事而收之夜  
藏於獄亦加明刑以恥之不使坐嘉石其罪已著未  
忍刑之

凡歲時有天患民病則以節巡國中及郊野而以王命  
施惠

調人掌司萬民之難而諧和之

注難相與為仇讎

凡過而殺傷人者以民成之

注過無本意也成平也以鄉里之民共和解之

鳥獸亦如之

注過失殺傷人之畜產者

凡和難父之讎辟諸海外兄弟之讎辟諸千里之外從父兄弟之讎不同國君之讎眡父師長之讎眡兄弟主友

之讎眠從父兄弟

辟音避從才用  
反眠音視下同

注和之使辟於此不得就而仇之九夷八蠻六戎五  
狄謂之四海主大夫君也春秋傳曰事吳敢不如事  
主

疏此經畧言其不言者以服約之伯叔父母兄弟  
子與兄弟同祖父母曾祖父母高祖父母其孫承  
後者皆斬衰與父同其不承後者祖與伯叔同曾  
高與從父兄弟同以其同繩屨也異義古周禮說

復讎可盡五世之內五世之外施之於已則無義  
施之於彼則無罪所服者惟謂殺者之身尚在彼  
殺者子孫可盡五世得復之

弗辟則與之瑞節而以執之

注和之而不辟者是不從王命也王以剡圭使調人  
執之治其罪

疏典瑞云剡圭以和難故鄭知瑞節是剡圭也訓  
案和難乃穀圭琰圭以易行以除慝非和難

凡殺人有反殺者使邦國交讎之

注反復也復殺者此欲除害弱敵也邦國交讎之明不和諸侯得者即誅之

疏復殺者謂既殺一人其有子弟復殺之恐後與已為敵而害已也

凡殺人而義者不同國令勿讎讎之則死

注義宜也謂父母兄弟師長嘗辱焉而殺之者凡有鬪怒者成之不可成者則書之先動者誅之

訓調人所掌律令有二殺人者死宜也過而殺人則有可原之情非士師而殺人罪也殺所當殺則無復仇之理此二者調人主為和諧之辟諸海外辟諸千里之外過而殺人者也使之辟之即所謂以民成之也凡殺人謂復仇者反殺謂仇之子弟又復仇復之無已是相殺而已矣殺人而義謂殺之有名然其罪未及於死如奸淫之類此皆殺所當殺者也使邦國交讎之讎之則死亦所謂諧和之

金史四十八卷  
其餘無故殺人怙終殺人者則士有明條非調人之職矣

媒氏掌萬民之判

注判半也得耦為合主合其半成夫婦也

凡男女自成名以上皆書年月日名焉

上時掌反

注鄭司農云成名謂子生三月父名之

令男三十而娶女二十而嫁

注二三考天地相承覆之數



疏王肅曰男三十而娶女二十而嫁謂男女之限  
嫁娶不得過此也

凡娶判妻入子者皆書之

注書之者以別未成昏禮者入子容媵姪娣不聘之  
者

中春之月令會男女

注中春陰陽交以成昏禮順天時也

疏有故者得不用仲春

於是時也奔者不禁若無故而不用令者罰之

注無故謂無喪禍之變也有喪禍者娶得用非中春之月

疏有喪禍者喪服月數滿雖非中春可以嫁娶

司男女之無夫家者而會之

注無夫家謂男女之鰥寡者

凡嫁子娶妻入幣純帛無過五兩

注純實緇字也納幣用緇婦人陰也五兩十端也士

大夫乃以玄纁束帛天子加以穀圭諸侯加以大璋  
雜記曰納幣一束束五兩兩五尋然則每端二丈

疏嫁子娶妻含尊卑但云緇帛文主庶人耳此昏  
禮每端二丈若餘行禮則用制幣丈八尺

禁遷葬者與嫁殤者

注遷葬謂生時非夫婦死既葬遷之使相從也殤十  
九以下未嫁而死者生不以禮相接死而合之是亦  
亂人倫者也

疏遷葬謂成人非夫婦者

凡男女之陰訟聽之於勝國之社其附於刑者歸之於

士

注亡國之社奄其上而棧其下使無所通就之以聽  
陰訟之情明不當宣露其罪不在赦宥者直歸士而  
刑之不復以聽

疏云不在赦宥者歸于士明赦宥者媒氏聽之訓  
媒氏掌萬民之判其别有三一是六禮備而成婚

者一是禮不備而為妾者一是鰥寡無依許其判  
合者男女三十而娶二十而嫁此備禮而成婚者  
娶判妻者鰥寡者也既為鰥寡則男不必三十女  
不必二十矣娶入子者為妾者也妾媵之屬八歲  
備數十五從嫡二十承事君子是妾人亦不必待  
二十也中春命會男女欲無失時使之三十而娶  
二十而嫁也於時有六禮不備奔而為妾者亦不  
必如所謂娶入子者也其或男女之無夫家者亦

會之所謂娶判妻者也判妻有二或人所出之妻  
或微賤無志夫死不能自存者舉判妻則鰥夫在  
焉

司市掌市之治教政刑量度禁令

注量豆區斗斛之屬度丈尺也

疏云掌市之治者下文聽大治小治也教即以次  
叙分地之等教之處置貨物是也政即下文以政  
令禁物靡是也刑即下文以刑罰禁鬻是也量度

即下文以量度成賈是也禁令即下文以賈民禁  
偽是也

以次敘分地而經市

注次謂吏所治舍思次介次也叙肆行列也經界也  
以陳肆辨物而平市

注陳猶列也辨物物異肆也肆異則市平

以政令禁物靡而均市

注物靡者易售而無用禁之則市均

金定四庫全書  
以商賈阜貨而行布

注通物曰商居賣物曰賈布謂泉也

以量度成賈而徵儋

賈音嫁儋劉音育鼎氏音笛  
字林他竺反玉篇餘祝切

注徵召也儋買也物有定賈則買者來也

以質劑結信而止訟

注質劑謂兩書一札而別之也若今下手書言保物

要還矣

疏恐民失信有所違負故為券書以結之獄訟本



由無信既結信則無訟也

以賈民禁偽而除詐

注賈民胥師賈師之屬必以賈民為之者知物之情  
偽與實詐

疏知賈民是胥師賈師之屬者案胥師職云察其  
詐偽飾行僨慝而誅罰之

以刑罰禁越而去盜

注刑罰憲徇扑

以泉府同貨而斂賒

賒音奢

注同共也同者謂民貨不售則為斂而買之民無貨則賒貫而予之訓以陳肆辨物而平市者美惡別異則物不淆而市情平禁物靡而均市者爭尚靡物則其餘者滯而市不均故禁之以次斂分地市之經也以下是其緯也辨物則濫惡不作禁物靡則珍異不貴濫惡不作而民厚珍異不貴而俗朴此阜財之本也商賈輻輳則源如流水量度畫一則貿易來集此

通財之法也利之所在則有鬪爭奸詐強暴之事亦  
盛世所不免者結之以信禁之以令威之以刑此防  
財之弊也然貨有不售而買或不遇則市有時而窮  
官為法以斂賒之而各得其所此理財之權也

大市日昃而市百族為主朝市朝時而市商賈為主夕  
市夕時而市販夫販婦為主

昃音側本又作  
是販方萬反

注日昃昃中也市襍聚之處言主者謂其多者也百  
族必容來去商賈家於市城販夫販婦朝資夕賣因

其便而分為三時之市所以了物極衆鄭司農云百族百姓也

疏案市朝一夫各方百步就百步分為三市恐不可蓋一夫據司市及胥師賈師聽事之處若列肆則多矣言主謂其多者蓋百族為主則兼有商賈販夫販婦商賈為主則兼有百族販夫販婦販夫販婦為主則兼有百族與商賈也云百族必容來去者百族或在城內或在城外也朝資夕賣者朝

買之至夕乃賣也了物極衆者分爲三市欲以了其所賣衆物也此所謂以商賈阜貨而行布也

凡市入則胥執鞭度守門市之羣吏平肆展成奠賈上旌于思次以令市市師泣焉而聽大治大訟胥師賈師

泣于介次而聽小治小訟

奠音定奠賈之賈音嫁

注凡市入謂三時之市市者入也胥守門察僞詐也執鞭度以威正人衆也度謂丈也因刻丈尺耳羣吏胥師以下平肆平賣物者之行列使之正也展之言

整也成平也會平成市物者也奠讀為定上旌者以  
為衆望也見旌則知當市也思次若今市亭也市師  
司市也介次市亭之屬別小者也思當為司聲之誤  
也

疏鞭度一物二用以繫鞬於上則為鞭以長丈二  
因刻丈尺則為度訓平肆者肆長之事展成定賈  
者賈師之事皆於市入之時各執其職此所謂以  
次分地而經市也

凡萬民之期于市者辟布者量度者刑戮者各于其地之敎

注期謂欲賣買期決于市也辟布市之羣吏考實諸泉入及有遺忘量度若今處斗斛及丈尺也

疏各于其地之敎謂諸物行肆之所也云及有遺忘者謂羣吏考實泉之處有遺忘者今本主識認之處斗斛及丈尺者謂置斗斛於米粟之肆置丈尺於絹布之肆訓列肆謂之敎者蓋粟米與粟米

為一列布帛與布帛為一列也期謂日昃及朝夕  
之期期于市買賣者也辟布法所應輸布屨人所  
斂是也量度謂賣債之人恐有多寡長短之不齊  
而考斗斛丈尺於官以成價如質人所巡而考者  
是也各于其地之斂如期于市者欲粟米則認某  
列是粟米之肆餘以類推辟布如某肆泉入則揭  
曰某肆所輸布量度如某肆賣債欲考斗斛丈尺  
則就本肆肆長考之刑戮如某肆之民犯法則就



本肆行之

凡得貨賄六畜者亦如之三日而舉之

注得遺物者亦使置其地貨於貨之肆馬於馬之肆  
則主求之易也三日而無識認者舉之没入官訓此  
謂凡得遺物者亦揭於官曰某肆所得自萬民之期  
於市至此所謂以敎分地而經市也

凡治市之貨賄六畜珍異亡者使有利者使阜害者使  
亡靡者使微

注利利於民謂物實厚者害害於民謂物行苦者使  
有使阜起其賈以徵之也使亡使微抑其價以卻之  
也鄭司農云亡者使有無此物則開利其道使之有  
訓使有使阜者用物也使亡使微者異物也此所謂  
以政令禁物靡而均市也市之中必先來商賈以實  
之然後設次斂以整之然不貴異物賤用物乃先王  
之本意故又有政令以風之三者皆市政之大者故  
司市治之其餘則見於質人諸官

凡通貨賄以璽節出入之

注璽節印章如今斗檢封矣使人執之以通商以出貨賄者王之司市也以內貨賄者邦國之司市也

疏案漢法斗檢封其形方上有封檢其內有書則周時印章上書其物識事而已訓王畿之內五十里有市蓋亦有市官之屬在焉出入貨賄皆有璽節不必盡侯國之司市而後為入也

國凶荒札喪則市無征而作布

注有災害物貴市不稅為民乏困也金銅無凶年因物貴大鑄泉以饒民

凡市偽飾之禁在民者十有二在商者十有二在買者十有二在工者十有二

注鄭司農云所以俱十有二者工不得作賈不得粥商不得資民不得畜玄謂王制曰用器不中度不粥於市兵車不中度不粥於市布帛精麤不中數幅廣狹不中量不粥於市姦色亂正色不粥於市五穀不

時果實未熟不粥于市木不中伐不粥于市禽獸魚鼈不  
中殺不粥于市亦其類也於四十八則未聞數十二焉  
疏數十二者用器一兵車二布三帛四姦色五  
穀六果實七木八禽九獸十魚十一鼈十二訓察  
而禁之者胥師賈師之事

市刑小刑憲罰中刑徇罰大刑扑罰其附于刑者歸于  
士

注徇舉以示其地之衆也扑撻也鄭司農云憲罰播

其肆也

疏附于刑謂五刑市刑輕無五刑訓憲而巡之者  
司越司稽之事

國君過市則刑人赦夫人過市罰一幕世子過市罰一  
市命夫過市罰一蓋命婦過市罰一帷

幕劉音莫  
帝音亦

注謂諸侯及夫人世子過其國之市大夫內子過其  
都之市也市者人所交利而行刑之處君子無故不  
遊觀焉若遊觀則施惠以為說也國君則赦其刑人

夫人世子命夫命婦則使之出罰異尊卑也所罰謂  
憲徇扑也必罰幕帟蓋帷市者衆也此四物者在衆  
之用也此王國之市而說國君以下過市者諸侯之  
於其國與王同以其足以互明之

凡會同師役市司帥賈師而從治其市政掌其賣儷之  
事

注市司司市也儷買也會同師役必有市者大衆所  
在來物以備之

質人掌成市之貨賄人民牛馬兵器珍異

注成平也會者平物價而來主成其平也人民奴婢也珍異四時食物

疏會謂市人會聚買賣云珍異四時食物者見下  
廛人云凡珍異之有滯者斂而入于膳府訓此與  
賈師有異賈師主平物價是現前買賣之事質人  
主治質劑是買賣之後或有負約不信者質人主  
為平治之



凡賣債者質劑焉大市以質小市以劑

注質劑者為之券藏之也大市人民馬牛之屬用長券小市兵器珍異之物用短券訓質劑焉者謂就質人處立質劑

掌稽市之書契同其量度壹其淳制巡而攷之犯禁者

舉而罰之

杜子春云淳當為純

注稽猶攷也治也書契取予市物之券也其券之象書兩札刻其側淳謂幅廣制謂匹長皆當中度量

凡治質劑者國中一旬郊二旬野三旬都三月邦國朞  
期內聽期外不聽

注謂齋券來訟也以期內來則治之後期則不治所  
以絕民之好訟且息文書也郊遠郊也野甸稍也都  
小都大都訓質人所主即所謂以質劑結信而止訟  
以度量成價而徵債也賣債曰質劑取予曰書契治  
質劑者謂民有爭競使之取其券書為辭以相質也  
雖國中猶遲至一旬者蓋令兩下具辭辨答彼此各

無悔誤而後聽之春秋傳王叔與伯與合要王叔不能舉其契正義曰謂使兩家各為要約言語兩相答辦伯與辭直王叔無以應之故不能舉其要契之辭亦此類也

廛人掌斂市斂布總布質布罰布廛布而入于泉府

音斂

次本或作次總杜音僂  
鄭音摠僂音讒摠音摠

注鄭司農云斂布列肆之稅布杜子春云總當為僂謂無肆立持者之稅也玄謂總讀如租摠之摠摠布

謂守斗斛銓衡者之稅也質布質人所罰犯質劑者之泉也罰布犯市令者之泉塵布者貨賄諸物邸舍之稅

凡屠者斂其皮角筋骨入于玉府

注以當稅給作器物也其無皮角及筋骨不中用亦稅之

疏云無皮角及筋骨不中用亦稅之者如豕之類是不中用亦使出稅以當邦賦

凡珍異之有滯者斂而入于膳府

注珍異四時食物不售而在廛久則將瘦臞腐敗為  
買之入膳夫之府所以紓民事而官不失實

胥師各掌其次之政令而平其貨賄憲刑禁焉

注憲表縣之

察其詐偽飾行僨慝者而誅罰之

行下孟反  
慝他得反

注飾行僨慝謂使人行賣惡物於市巧飾之令欺誑  
買者訓此所謂偽飾之禁

聽其小治小訟而斷之

賈師各掌其次之貨賄之治辨其物而均平之展其成

而奠其賈然後令市

賈音古其賈音嫁奠音定

注辨別也

疏云辨其物而均平之與胥師同云展其成而奠其價與胥師異以其知物價故也訓凡言辨者皆謂辨其美惡成謂成其賣買物辨而後賣買可成價可定而著為市之令也展謂巡視之

凡天患禁貴儋者使有恒賈

注謂若睹米穀棺木而睹久雨疫病者貴賣之

疏云米穀棺木者以其天患無過凶荒札喪

四時之珍異亦如之

注薦宗廟之物

凡國之賣儋各帥其屬而嗣掌其月

注儋買也鄭司農云謂官有所介令賣賈師帥其屬

更相代直月為官賣之

疏帥其屬者賈師之下有羣賈亦二肆則一人

凡師役會同亦如之

司越掌憲市之禁令禁其鬪踴者與其越亂者出入相

陵犯者以屬遊飲食于市者

踴五羔反  
又許驕反

注以屬遊飲食羣飲食者

若不可禁則搏而戮之

搏音博

司稽掌巡市而察其犯禁者與其不物者而搏之

注不物衣服視占不與衆同及所操物不如品式



掌執市之盜賊以徇且刑之

徇辭  
後反

胥各掌其所治之政執鞭度而巡其前掌其坐作出入之禁令襲其不正者

注作起也坐起禁令當市而不得空守之屬訓坐作出入不正蓋亦司稽所謂不物者歟

凡有罪者撻戮而罰之

注罰之使出布

疏此即墮人罰布

肆長各掌其肆之政令陳其貨賄名相近者相遠也實相近者相爾也而平正之

注爾亦近也俱是物也使惡者遠善善自相近鄭司農云謂若珠玉之屬俱名為珠玉而賈或百萬或數萬別異令相遠使賈人不得雜亂以欺人訓相爾相遠疑謂列肆蓋粗監者與粗監者為列精良者與精良者為列不得以名相殺也

敝其總布掌其戒禁

注杜子春云總當為儻

疏此肆長各主一肆故罰其無肆立持之布上屨  
人掌依行肆者不得為無肆立持故後鄭破從租  
穗之穗訓胥師賈師掌禁偽除詐之事司越司稽  
掌刑罰禁暴之事肆長掌陳肆辨物之事胥則胥  
師之役也肆長亦賈師之屬也司稽則司越之貳  
也胥師掌禁偽除詐而亦兼刑罰之事賈師掌禁  
偽除詐而實主辨物之事此皆職事相因賈師掌

帥其屬而嗣掌其月屬蓋卽肆長是也疏言賈師下有羣賈二肆則一人稽於經而無之肆長各掌一肆而云斂其總布則總布每肆皆有之廛人所斂者質布罰布是犯市法者之泉廛布是市地之稅總布蓋貨物之征謂之總者總總然聚意歛布古或作次蓋吏所治舍人置貨物于中則有稅及得市遺物三日而舉者是為歛布耳胥師以下至肆長依序官以大小為先後不以事為序也

泉府掌以市之征布斂市之不售貨之滯于民用者以  
其賈買之物褐而書之以待不時而買者買者各從其  
抵都鄙從其主國人郊人從其有司然後予之

褐音竭  
抵音帝

廣韻音邱  
都禮反

注鄭司農云物褐而書之書其賈也抵故賈也主別  
治大夫也然後予之為封符信然後予之立謂抵實  
抵字抵本也本謂所屬吏主有司是也

疏征布即屨人紵布已下之布云主別治大夫者

公卿大夫常在王朝其都鄙則遣人治之若季氏費宰公山弗擾之輩訓抵謂本其姓氏里居在都鄙人則問其屬何主在郊在國之人則問是屬何鄉官

凡賒者祭祀無過旬日喪紀無過三月

疏祭祀喪紀事大故賒與民不取利

凡民之貸者與其有司辨而授之以國服為之息

注有司其所屬吏也與之別其貸民之物定其賈以

子之以國服為之息以其於國服事之稅為息也於國事受園廛之田而貸萬泉者朞出息五百

疏貸舉物生利與上文不同有司兼都鄙主凡言服者服事為名民之服事惟有出稅載師云二十而一已下是也受園廛而貸萬泉者朞出息五百計當二十取一也近郊遠郊已下可推

凡國事之財用取具焉歲終則會其出入而納其餘注納入也入餘於職幣訓家君子曰凡國之財用取

具謂當需布者非國用盡取具於泉府也 出謂共  
國用入謂市之征布及取息買者不須主及有司親  
來但言其所屬何氏貸者則須與其有司辨而授之

司門掌授管鍵以啓閉國門

鍵其展反廣韻音件  
其輦切司農音蹇

注鄭司農云鍵讀為蹇管謂籥也鍵為牡

疏此王城十二門籥以啓門鍵以閉門訓凡鎖入  
者謂之鍵容者謂之閉闕者謂之籥

幾出入不物者正其貨賄凡財物犯禁者舉之



注不物衣服視占不與衆同及所操物不如品式正讀為征征税也訓犯禁即司市偽飾之禁

以其財養死政之老與其孤

注財所謂門閭之委積也死政之老死國事者之父母也孤其子

祭祀之牛牲繫焉監門養之

注監門門徒

疏若祭天地宗廟則使充人繫于牢芻之三月若

散祭祀則遣監門養之不必在牢三月也

凡歲時之門受其餘

注受祭門之餘

疏歲時之門謂四時祭門若月令秋祭門是祭廟  
門此國門除時祭外仍有為水祈禱故春秋大水  
有用牲于門之事

凡四方之賓客造焉則以告

注告告于王而止客以俟逆

疏諸侯來朝覲至闕闕人告王至郊郊人告王至國門門人告王王得告皆遣人往迎

司闕掌國貨之節以聯門市

注貨節謂商本所發司市之璽節也自外來者則按其節而書其貨之多少通之國門國門通之司市自內出者司市為之璽節通之國門國門通之闕門參相聯以檢猾商

疏案其節而書貨之多少者謂過所文書若下文

節傳至關至門皆別寫一通入關入門皆案勘而過

司貨賄之出入者掌其治禁與其征厘

注征厘者貨賄之稅與所止邸舍也關下亦有邸客舍其出布如市之厘

凡貨不出于關者舉其貨罰其人

注不出於關謂從私道出辟稅者則沒其財而撻其人

凡所達貨賄者則以節傳出之

傳張  
戀反

注商或取貨於民間無璽節者至闕關為之璽節及傳出之其有璽節亦為之傳傳如今移過所文書

國凶札則無關門之征猶幾

札側八反  
又音裁

注凶謂凶年饑荒札謂疾疫死亡越人謂死為札

疏上司門不言無征故於闕并言也

凡四方之賓客敝闕則為之告

敝音叩玉篇或作扣  
廣韻音苟古厚切

注謂朝聘者也敝闕猶謁闕人也

有外內之送令則以節傳出內之

注有送令謂奉貢獻及文書以常事往來環人之職  
所送迎通賓客至關則為之節與傳以通之

疏外之送令謂從侯國而入內之送令謂從王國  
而出訓外內送令已自有節故環人送迎賓客亦  
有路節但過關則司關又換節與之

周禮纂訓卷七

欽定四庫全書

周禮纂訓卷八

安溪李鍾倫撰

掌節掌守邦節而辨其用以輔王命

注邦節者珍圭牙璋穀圭琬圭琰圭也王有命則別其節之用以授使者輔王命者執以行為信

疏崇典瑞云珍圭以徵守以恤凶荒牙璋以起軍旅以治兵守穀圭以和難以聘女琬圭以治德以

結好琰圭以易行以除慝璧羨之等則是王國所用非使者之節矣

守邦國者用玉節守都鄙者用角節

注謂諸侯於其國中公卿大夫王子弟於其采邑有命者亦自有節以輔之王節之制如王為之以命數為小大角用犀用其制未聞訓愚案邦節即下文所言注謂是圭璋恐未必然守邦國用玉節守都鄙用角節亦對下文諸節用金用竹用印用符耳謂玉節



之制如王更為無據未敢從也

疏云有命者亦如王有命亦有節以輔之也云王  
節如王為之者以諸侯國內亦有徵守好難起軍  
旅之等故知與王同也知以命數為小大者以其  
命圭之等亦依命數故也其天子玉節則自以小  
大為數訓此諸侯及采邑之君自行於其封內之  
節若出使封外則諸侯用虎節人節龍節都鄙則  
用管節如小行人所云是也故小行人文云達天

下之六節是言通行之節也故不言王節角節且此僅言守邦國守都鄙守者的是封內與下文使節異也然則下文僅言邦國之使節不言都鄙之使節何也蓋掌節所謂使節者乃王朝有事使於邦國之節自侯國來者其節之別亦如之則小行人所云是也王朝出使之節則使都鄙與邦國同故言邦國以見都鄙封君出使之節則邦國與都鄙異故小行人中都鄙復別用管節也然則小行

人無貨賄之璽節何也蓋行人主朝聘賓客有送迎之事商賈阜貨而行布不須以送迎禮之故不見於行人也

凡邦國之使節山國用虎節土國用人節澤國用龍節皆金也以英蕩輔之

注使節使卿大夫聘於天子諸侯行道所執之信也土平地也山多虎平地多人澤多龍以金為節鑄象馬杜子春云蕩當為帑謂以函器盛此節或曰英蕩

畫函

疏使卿大夫聘於天子諸侯者大聘使卿小聘使大夫或於天子或於諸侯也云英蕩畫函其函猶是蕩而英華有畫義

門闕用符節貨賄用璽節道路用旌節皆有期以反節注門闕司門司闕也貨賄主通貨賄之官謂司市也道路主治五涂之官謂鄉遂大夫也凡民遠出至于邦國邦國之民若來入由門者司門為之節由闕者

司關為之節商則司市為之節其以徵令及家徙則鄉遂大夫為之節唯時事而行不出關不用節也變司市言貨賄者璽節主以通貨賄貨賄非必由市或資于民家焉變鄉遂言道路者容公邑及小都大都之吏皆主治五涂亦有民也符節如今宮中諸官詔符璽節今之印章旌節今使者所擁節是也凡節有法式藏於掌節

疏知徵令有節者見鄉大夫云國有大故以徵節

輔令則達之知徙家有節者見比長云若徙於他則為之徵節以行之云貨賄非必由市或資於民家則由門者司門與之節由關者司關與之節也訓凡掌節以節出內往來之人未必皆是遣胥徒親送之其反節亦不必是其人親來反蓋以節送人或是將節遞與鄉遂都鄙之吏因使其民彼此節節遞送之其來反亦然若今時為官府遞送文書亦有此法

凡通達於天下者必有節以傳輔之

疏有傳無節有節無傳或節傳俱無則不得達

無節者有幾則不達

注園土內之

遂人掌邦之野

注郊外曰野此野謂甸稍縣都

疏知野是甸稍縣都者蓋此遂人不云掌遂又見  
下文以達于畿明兼掌三百里外其有溝洫井田

法皆知之也

以土地之圖經田野造縣鄙形體之灋五家為鄰五鄰為里四里為鄣五鄣為鄙五鄙為縣五縣為遂皆有地域溝樹之使各掌其政令刑禁以歲時稽其人民而授之田野簡其兵器教之稼穡

鄣作管反

注遂之軍法追胥起徒役如六鄉

疏鄉遂出軍雖相如然鄉以上劑致民遂以下劑致民是其稍異也



凡治野以下劑致𪔐以田里安𪔐以樂昏擾𪔐以土宜  
教𪔐稼穡以興耨利𪔐以時器勸𪔐以疆予任𪔐以土

均平政

𪔐說文田民與𪔐同廣韻音覺莫耕切耨音助李又音鉏疆其良反

注𪔐猶懵懵無知貌致猶會也民雖受上田中田下

田及會之以下劑為率謂可任者家二人樂昏勸其

昏姻如媒氏會男女也擾順也時器鑄作耒耜錢鎛

之屬疆予謂民有餘力復予之田若餘夫然政讀為

征土均掌均平其稅鄭大夫讀耨為藉杜子春讀耨

為助謂起民人令相佐助

疏六鄉家取一人為正卒其餘為羨卒六遂家取一人為正卒一人為羨卒外為餘夫是下劑致民田謂百畝之田里謂五畝之宅土宜者高田種黍稷下田種稻麥

辨其野之土上地中地下地以頒田里上地夫一廛田百畝萊五十畝餘夫亦如之中地夫一廛田百畝萊百畝餘夫亦如之下地夫一廛田百畝萊二百畝餘夫亦

如之

晦音畝  
萊音來

注萊謂休不耕者廬城邑之居六遂之民竒受一廬  
雖上地猶有萊皆所以饒遠也

疏云六遂竒受一廬者釋經餘夫亦如之餘夫竒  
別受田備後離居之法訓鄭以六鄉餘夫不別受  
廬又上地不復加萊據大司徒造都鄙法不易一  
易再易即此上中下地彼不言餘夫亦如之又無  
萊五十畝此法見於司徒而司徒主六鄉故以為鄉

之田制如此然彼實都鄙法鄉當從遂鄭於田法  
軍法既以鄉遂為類矣而又以鄉與都鄙為一法何  
也豈一人之精文重思繁耶

凡治野夫間有遂遂上有徑十夫有溝溝上有畛百夫  
有洫洫上有涂千夫有澮澮上有道萬夫有川川上有  
路以達于畿

畛之忍反劉音真洫  
況域反澮古外反

注十夫二鄰之田百夫一鄣之田千夫二鄙之田萬  
夫四縣之田遂溝洫澮皆所以通水於川也遂廣深

各二尺溝倍之洫倍溝溝廣二尋深二仞徑畛涂道路皆所以通車徒於國都也徑容牛馬畛容大車涂容乘車一軌道容二軌路容三軌萬夫者方三十三里少半里九而方一同以南畝圖之則遂從溝橫洫從澮橫九澮而川周其外去山陵林麓川澤溝瀆城郭宮室涂巷三分之制其餘如此以至于畿則中雖有都鄙遂人盡主其地

疏鄭知溝洫深廣者約匠人井田法而言云萬夫

方三十三里少半里者萬夫之田方三十三里百步百步是少半里此川與匠人川異彼是大川此川亦人造雖無丈尺蓋亦倍澮耳訓溝洫有圖在後

以歲時登其夫家之衆寡及其六畜車輦辨其老幼廢疾與其施舍者以頒職作事以令貢賦以令師田以起

政役

施武氏反  
政音征

注夫家猶言男女也職謂民九職也分其農牧衡虞

之職使民為其事也

若起野役則令各帥其所治之民而至以遂之大旗致之其不用命者誅之

注役謂師田若有功作也遂之大旗熊虎

凡國祭祀共野牲令野職

注供野牲入於牧人以待事也野職薪炭之屬

疏野牲謂牛羊豕云野職薪炭之屬者遂人令之

委人斂之

凡賓客令脩野道而委積

注委積於廬宿市

疏令令遣人也

大喪帥六遂之役而致之掌其政令及葬帥而屬六綍

及窆陳役

屬音燭  
綍音弗

注致役致於司徒給墓上事及窆也綍舉棺索也葬

舉棺者謂載與說時也用綍旁六執者天子其千人

與陳役者主陳列之耳匠師帥監之鄉師以斧涖焉



大喪之正棺殯啓朝及引六鄉役之載及窆六遂役之亦即遠相終始也鄭司農云窆謂下棺時遂人主陳役也禮記謂之封春秋謂之塋

疏知六遂給墓上事及窆者以引時是六鄉役之云縛舉棺索者據在棺曰縛據在道曰引云即遠相終始者六鄉近使主殯及啓朝為始在祖廟之中將行載棺於蜃車屬六縛則六遂為終在道屬六引又六鄉為始至塋用縛下棺還使六遂為終

天子執紼千人者約雜記諸侯執紼五百人而言  
凡事致野役而師田作野民帥而至掌其政治禁令  
遂師各掌其遂之政令戒禁以時登其夫家之衆寡六  
畜車輦辨其施舍與其可任者經牧其田野辨其可食  
者周知其數而任之以徵財征作役事則聽其治訟  
注經牧制田界與井也可食謂今年所當耕者也財  
征賦稅之事

疏任之據人民之數徵財征據田野之數役事兼

軍旅田獵功作經牧制田界與井者遂人亦兼掌  
采地井田法故經云經牧與小司徒文同訓任之  
兼任地任人財謂賦征亦可兼役此云經牧與井  
牧不同遂人惟主溝洫經絕無兼都鄙之文其云  
牧者以田率皆再易故借用之耳

巡其稼穡而移用其民以救其時事

注移用其民使轉相助救時急事也訓時事或如旱  
潦之災

凡國祭祀審其誓戒共其野牲

疏戒遂之民

入野識野賦于王府

注民所入貨賄以當九職九賦中王府之用者

疏遂師徵之以入大府分之衆府也訓野兼稍縣  
都言野則鄉亦入之矣

賓客則巡其道脩庀其委積

庀又作庇匹爾反具也劉  
副美反又芳米反廣韻音

評

注巡其道脩行治道路也

大喪使帥其屬以幄帝先道野役及窆抱磨共丘籠及

蜃車之役

磨劉音歷籠力  
董反蜃市軫反

注使以幄帝先者太宰也其餘司徒也幄帝先所以  
為葬窆之間先張神坐也道野役帥以至墓也丘籠  
之役窆復土也其器曰籠蜃車柩路也柩路載柩四  
輪迫地而行有似于蜃因取名焉行至壙乃說更復  
載以龍輜役謂執紼者鄭司農云抱磨磨下車也玄

謂磨者適歷執縛者名也遂人主陳之而遂師以名  
行校之

疏知使以幄帟先是太宰者以幕人屬太宰云其  
餘司徒者司徒主衆庶故知野役之徒司徒令之  
云竈復土者竈謂穿地復土謂反土為丘壟云適  
歷執縛者名也者分布稀疎名為適歷

軍旅田獵平野民掌其禁令比敘其事而賞罰

注平謂正其行列部伍也訓其事如旗鼓兵器之屬

遂大夫各掌其遂之政令以歲時稽其夫家之衆寡六畜田野辨其可任者與其可施舍者以教稼穡以稽功事掌其政令戒禁聽其治訟

施鄭讀亦為訖

注功事九職之事

令為邑者歲終則會政致事

注不言其遂之吏而言為邑者容公邑及卿大夫王子弟之采邑政令戒禁遂大夫亦施焉

正歲簡稼器脩稼政

注簡猶閔也稼器耒耜鉏耨之屬稼政孟春之月令  
所云皆脩封疆審端經術善相丘陵阪險原隰土地  
所宜五穀所殖以教道民必躬親之

三歲大比則帥其吏而興眊明其有功者屬其地治者  
注興眊舉民賢者能者如六鄉之為也屬猶聚也又  
因舉吏治有功者而聚勅其餘以職事

凡為邑者以四達戒其功事而誅賞廢興之

注四達者治民之事大通者有四夫家衆寡也六畜



車輦也稼穡耕耨也旗鼓兵革也

縣正各掌其縣之政令徵比以頒田里以分職事掌其

治訟趨其稼事而賞罰之

趨如字本又作趨音促

注徵召也比案也

疏頒田里夫一廛田百畝是也職事九職之事

若將用野民師田行役移執事則帥而至治其政令

注移執事移用其民轉相佐助

既役則稽功會事而誅賞

金匱要略卷八  
鄙師各掌其鄙之政令祭祀

注祭祀祭禋也

疏六鄉黨祭禋鄙與黨同

凡作民則掌其戒令

注作民謂起役也

以時數其衆庶而察其媮惡而誅賞歲終則會其鄙之政而致事

鄮長各掌其鄮之政令以時校登其夫家比其衆寡以

治其喪紀祭祀之事

注校猶數也

疏喪紀謂民之喪紀祭祀若族祭酺之類若然縣當祭社與州同鄉遂互見為義也

若作其民而用之則以旗鼓兵革帥而至若歲時簡器與有司數之

注簡器簡稼器也兵器亦存焉有司遂大夫

凡歲時之戒令皆聽之趨其耕耨稽其女功

注聽之受而行之者

里宰掌比其邑之衆寡與其六畜兵器治其政令

注邑猶里也

以歲時合耦于鋤以治稼穡趨其耕耨行其秩斂以待  
有司之政令而徵斂其財賦

注考工記曰耜廣五寸二耜為耦兩人相助耦而耕  
也鄭司農云耜讀為藉杜子春云耜讀為助謂相佐  
助也玄謂耜者里宰治處也於此合耦使相佐助因

放而為名季冬月令命農計耦耕事脩耒耜具田器  
是其歲時與秩敘受耦相佐助之次第

疏有司徵斂謂縣師旅師也古時皆用人耦未有  
牛耦耕至漢搜粟都尉趙過始教民牛耕乃絕人  
耦

鄰長掌相糾相受

疏鄰長不命之士相受者宅舍有故使五家相容  
受

凡邑中之政相贊

注長短使相補助

疏一里之內有上政令徵求五鄰共相贊助

徙于他邑則從而授之

注授猶付也

旅師掌聚野之勑粟屋粟聞粟

聞音聞

注野謂遠郊之外勑粟民相助作一井之中所出九

夫之稅粟也屋粟民有田不耕所罰三夫之稅粟聞

粟閒民無職事者所出一夫之征粟訓耨粟田賦屋  
粟曠土之稅閒粟游民之稅閒粟蓋閭師夫布是也  
粟布可通三農貢九穀或在耨粟之內其藪澤園圃  
工商嬪婦臣妾各以職為貢非粟布者見委人注  
而用之以質劑致民平頒其興積施其惠散其利而均

其政令

積子  
賜反

注而讀為若聲之誤也若用之謂恤民之艱阮委積  
於野如遺人於鄉里也若質劑致民案入稅者名會

而貸之興積所興之積謂三者之粟也平頒之不得  
偏頗有多少縣官徵聚物曰興是粟縣師徵之旅師  
餼之而用之以調衣食曰惠以作事業曰利均其政  
令者皆以國服為之息

疏云調衣食曰惠作事業曰利者衣食不生利故  
云惠作事業後即有利故云利訓下文凡新民之  
治皆聽之使無征役則是旅師雖掌聚餼亦均政  
役均其政令蓋是耶



凡用粟春頒而秋斂之

注困時施之饒時收之

凡新甿之治皆聽之使無征役以地之嫩惡為之等

注新甿新徙來者也治謂有所求乞使無征役復之也王制曰自諸侯來徙家期不從政以地嫩惡為之等七人以上授以上地六口授以中地五口以下授以下地與舊民同旅師掌斂地稅而又惠施散利是以屬用新甿焉訓新甿之治蓋分田里制疆界之事

以地嫩惡為之等免其征役亦有差等地嫩者復少年惡者復多年也復之年數蓋不易者一年一易者二年再易者三年

稍人掌令丘乘之政令

注丘乘四丘為甸甸讀與維禹數之之數同其訓曰乘由是改云

若有會同師田行役之事則以縣師之灋作其同徒輦輦帥而以至治其政令以聽於司馬

注有軍旅會同田役之戒縣師受法於司馬邦國都鄙稍甸郊里唯司馬所調以其法作其衆庶及馬牛車輦會其車人之卒伍使皆備旗鼓兵器以帥而至是以書令之有同徒司馬所調之同凡用役者不必一時皆徧以人數調之使勞逸遞焉

疏云凡用役不必一時已下釋同徒是同其勞逸也

大喪帥蜃車與其役以至掌其政令以聽於司徒

注蜃車及役遂人共之稍人者野監是以帥而致之  
既夕禮曰既正柩賓出遂匠納車於階間則天子以  
至於士柩路皆從遂來

疏此經上舉天子既夕下舉士則其中諸侯卿大  
夫蜃車柩路皆從遂人而來訓稍人掌都鄙但言  
丘乘者出兵以丘乘為法也

委人掌斂野之賦斂薪芻凡疏材木材凡畜聚之物

斂力

豔反畜  
勅六反

注所斂野之賦謂野之園圃山澤之賦也疏材草木有實者也畜聚之物瓜瓠葵芋禦冬之具也野之農賦旅師斂之工商嬪婦遂師以入王府其牧則遂師又以供野牲訓此蓋臣妾所貢者太宰職曰臣妾聚斂陳材

以稍聚待賓客以甸聚待羈旅

注聚凡畜聚之物也

凡其余聚以待頒賜

注余當為餘謂縣都畜聚之物

以式灋共祭祀之薪蒸木材賓客共其芻薪喪紀共其薪蒸木材軍旅共其委積薪芻凡陳材共野委兵器與其野囿財用

注式灋故事之多少也薪蒸給炊及燎麤者曰薪細者曰蒸木材給張事委積薪芻者委積之薪芻也軍旅又有疏材以助禾粟野委謂廬宿止之薪芻也兵器謂守衛陳兵之器野囿財用者苑囿藩籬之材

疏云木材給張事者案掌次云張大次小次并須  
木材云委積之薪芻者委積之中有牲牢米禾薪  
芻之等委人唯供薪芻也軍旅有疏材以助禾粟  
者疏材是百草根實可共馬牛助禾粟兵器承野  
委之下明同為賓客所用故知是守衛賓客陳兵  
之器也

凡軍旅之賓客館焉

注館舍也必舍此者就牛馬之用

疏軍旅之賓客謂諸侯以兵助王征討者

土均掌平土地之政以均地守以均地事以均地貢

政音

征

注所平之稅邦國都鄙也地守虞衡之屬地事農圃之職地貢諸侯九貢

以和邦國都鄙之政令刑禁與其施舍禮俗喪紀祭祀皆以地蠲惡為輕重之灋而行之掌其禁令

注禮俗邦國都鄙民之所行先王舊禮也隨其土地



厚薄為之制豐省之節訓和猶均也

草人掌土化之灋以物地相其宜而為之種

相息亮反  
種章勇反

注土化之灋化之使嫩以物地占其形色為之種黃

白宜以種禾之屬

凡糞種駢剛用牛赤緹用羊墳壤用麋渴澤用鹿鹹渴

用貆勃壤用狐埴塶用豕疆槩用蕢輕輿用犬

渴音昔  
一音鵲

貆音暄又九歡二音埴音寔常職切塶音盧廣韻落胡  
切一音間疆其兩反槩本又作檻呼覽反劉音檻蕢扶

云反輿字照反玉篇匹姚切輿  
同今亦作票廣韻音影撫招切

注凡所以糞種皆謂煮取汁也駢剛地色赤而土剛強赤緹鰓色也壤白色墳壤潤解渴澤故水處也渴鹵也貍貍也勃壤粉解者埴壚黏疏者疆檠強堅者蕢麻也輕輿輕脆者

稻人掌稼下地

注以水澤之地種穀也謂之稼者有似嫁女相生

以豬畜水以防止水以溝蕩水以遂均水以列舍水以

澮寫水以涉揚其芟作田

寫戚如字劉錫故反芟所銜反

注杜子春讀蕩為和蕩謂以溝行水也玄謂豬者畜  
流水之波也防豬旁隄也遂田首受水小溝也列田  
之畦畦也澮田尾去水大溝作猶治也開遂舍水於  
列中因涉之揚去前年所芟之草而治田種稻  
凡稼澤夏以水殄草而芟夷之

注將以澤地為稼者必於夏六月之時大雨時行以  
水病絕草之後生者至秋水涸芟之明年乃稼  
澤草所生種之芒種

注鄭司農云澤草之所生其地可種芒種芒種稻麥也

早曠共其雩斂

注稻人共雩斂稻急水者也鄭司農云雩事所發斂喪紀共其葦事

注葦以閭壙禦濕之事

土訓掌道地圖以詔地事

注道說也道地圖九州形勢山川所宜告王以施其

事若云荆揚宜稻幽并宜麻

道地慝以辨地物而原其生以詔地求

慝他得反

注地慝若瘴蠱然也辨其物者別其所有所無原其  
生生有時也以此二者告王之求也地所無及物未  
生則不求也

王巡守則夾王車

誦訓掌道方志以詔觀事

注說四方所識久遠之事以詔王觀博古所識若魯

有大庭之庫穀之二陵

疏方志四方所記久遠之事

掌道方慝以詔辟忌以知地俗

辟音避

注方慝四方言語所惡也不辟其忌則其方以為苟於言語也

王巡守則夾王車

山虞掌山林之政令物為之屬而為之守禁

注物為之屬每物有藩界也為之守禁為守者設禁

令也守者謂其地之民占伐林木者也鄭司農云厲  
遮列守之

疏山林是山內之林下林衡所掌是竹木生平地  
者山內林木金玉錫石禽獸所有不同每物各有  
藩界設禁

仲冬斬陽木仲夏斬陰木

注陽木生山南者陰木生山北者冬斬陽夏斬陰堅  
濡調

凡服耜斬季材以時入之

注季猶穉也服與耜宜用穉材尚柔忍也服牝服車之材

疏時即仲冬仲夏之時

令萬民時斬材有期日

注時斬材斬材之時也有期日入出有日數為久盡物訓此時蓋亦謂冬夏王制草木零落然後入山林當是夏殷之法



凡邦工入山林而掄材不禁

掄魯門反  
又音倫

注掄猶擇也不禁者山林國之有不拘日也

春秋之斬木不入禁

注非冬夏之時不得入所禁之中斬木也斬四野之木可

凡竊木者有刑罰若祭山林則為主而脩除且蹕  
注為主主辨護之也脩除治道路場壇

疏辨護謂共時用相禮儀

若大田獵則萊山田之野及弊田植虞旗于中致禽而

珥馬

植時力反又音值珥按易氏引劉中義云珥當為珥字之誤

注萊除其草萊也弊田田者止也田上樹旗令獲者皆致其禽而校其耳以知獲數也山虞有旗以其主山得畫熊虎其仞數則短也鄭司農云珥者取禽左耳以效功也大司馬職云獲者取左耳

疏植旗者使民得禽者望見之而致禽焉云除其草萊者謂於防南教戰之處芟去草萊南北二百

五十步東西步數雖未聞廣狹當容六軍也案司  
常云師都建旗山虞是士以其主山山多熊虎故  
亦有旗禮緯旌旗之杠天子九仞諸侯七仞大夫  
五仞士三仞今山虞雖有旗仞數則短宜三仞

林衡掌巡林麓之禁令而平其守

麓音鹿

注平其守者平其地之民守林麓之部分

疏山足曰麓雖連於山山虞不掌

以時計林麓而賞罰之

注計林麓者計其守之功也林麓蕃茂民不竊盜則有賞不則罰之

若斬木材則受灋于山虞而掌其政令

注法萬民入出時日之期

疏仲冬仲夏及春秋是時之期令萬民斬材有期日是日之期

川衡掌巡川澤之禁令而平其守以時舍其守犯禁者執而誅罰之

注舍其守者時案視守者於其舍申戒之

疏澤與川相連則川衡兼掌之若濟水溢為滎滎  
濟連是也訓舍讀如施舍之舍以時舍其守謂以  
時開禁使萬民得取之

祭祀賓客共川奠

注川奠籩豆之實魚繡蜃蛤之屬

澤虞掌國澤之政令為之厲禁使其地之人守其財物  
以時入之于王府頒其餘于萬民

注以時入之于王府謂皮角珠貝也入之以當邦賦  
然後得取其餘以自為也入出亦有時日之期

疏山虞川衡亦入王府此是互見為義

凡祭祀賓客共澤物之奠

注澤物之奠亦籩豆之實芹菲菱芡之屬

喪紀共其葦蒲之事

注葦以閨壙蒲以為席

疏為席謂抗席

若大田獵則萊澤野及弊田植虞旌以屬禽

注澤虞主澤澤鳥所集故得注析羽

疏屬禽謂百姓致禽訖虞人屬聚之別其類每禽  
取三十焉山虞云致禽與此互見為義

迹人掌邦田之地政為之屬禁而守之

注田之地若今苑也

凡田獵者受令焉

注令謂時與處也

禁麋卯者與其毒矢射者

麋音迷卯力管反

注麋麋鹿子

升人掌金玉錫石之地而為之厲禁以守之

升革猛反又號猛反

注錫銅也

若以時取之則物其地圖而授之

注物地占其形色

巡其禁令

角人掌以時徵齒角凡骨物於山澤之農以當邦賦之



政令

疏自此以上不言以當邦賦者皆文不具

以度量受之以共財用

羽人掌以時徵羽翮之政于山澤之農以當邦賦之政令

注翮羽本

凡受羽十羽為審百羽為搏十搏為縛

搏劉徒端反音團廣韻引周禮

百羽為搏又有紼註上同亦作縛音篆持充切玉篇縛直轉切引爾雅十羽謂之縛與紼同本文縛字劉音袞

古本切廣韻百羽為搏十搏為緝以音證  
字則縛字當為緝字傳寫之訛緝音渾

掌葛掌以時徵絺綌之材于山農凡葛征徵草貢之材  
于澤農以當邦賦之政令以權度受之

訓受之謂官以權度受此物之入

掌染草掌以春秋斂染草之物

注染草茅蒐橐蘆豕首紫荊之屬

疏茅蒐今之菼也可以染絳橐蘆豕首未審可染  
何色紫荊可以染紫

以權量受之以待時而頒之

注時染夏之時

疏天官染人秋染夏夏謂五色

掌炭掌灰物炭物之徵令以時入之

注灰炭皆山澤之農所出灰給澣練炭之所共甚多以權量受之以共邦之用凡炭灰之事

掌荼掌以時聚荼以共喪事

注共喪事者以著物也既夕禮曰茵著用荼

疏索既夕禮為茵之法用淺黑布各一幅合縫著以茶未入壙時先陳於棺下乃下棺茵上

徵野䟽材之物以待邦事凡畜聚之物

注徵者徵於山澤入於委人

掌蜃掌斂互物蜃物以共闡壙之蜃

注互物蚌蛤之屬闡猶塞也將井槨先塞下以蜃禦濕也春秋傳曰始用蜃炭言僭天子也

祭祀共蜃器之蜃

注飾祭器之屬也。鬯人職曰：凡四方山川用蜃器。春秋定十四年，秋，天王使石尚來歸蜃。蜃之器以蜃飾，因名焉。鄭司農云：蜃可以白器，令色白。

疏：此經蜃器，鄭總云祭器，則宗廟社稷之器皆用蜃飾之。故大行人云：歸蜃以交諸侯之福。是廟社皆用蜃飾器也。

其白盛之蜃

注：盛猶成也。謂飾牆使白之蜃也。

園人掌園游之獸禁

注園游園之離宮小苑觀處也

疏園游守門則是墨者故關人云王宮每門四人  
園游亦如之

牧百獸祭祀喪紀賓客共其生獸死獸之物

訓獸人所獻者田獵之獸此是園中所養之獸

場人掌國之場圃而樹之果蓏珍異之物以時斂而藏  
之凡祭祀賓客共其果蓏享亦如之

注享納牲

疏此謂祭宗廟二灌後君迎牲后夫人薦朝事之  
豆籩中有果蓏之物故云享亦如之若然上言祭  
祀餘祭祀也訓既言祭祀賓客又言享蓋享耆老  
孤子與

廩人掌九穀之數以待國之匪頒賙賜稍食

注匪讀為分分頒謂委人之職諸委積也賙賜謂王  
所賜予給好用之式也稍食祿廩訓匪頒即百官之

祿也稍食即百工之食也若專言稍食則亦可兼匪  
頒經中多有之賙賜即遺人所云是也好用蓋出於  
幣餘非此給也九賦九貢之入貨賄藏於內府珍玩  
藏於玉府泉布藏於外府米粟藏於廩人

以歲之上下數邦用以知足否以詔國用以治年之凶  
豐

注數猶計也

疏廩人以所得稅物多少之帳計國用足否此則



王制云制國用必於歲之杪是也

凡萬民之食食者人四鬴上也人三鬴中也人二鬴下

也

鬴音父  
扶雨反

注此皆謂一月食米也六斗四升曰鬴

疏食者謂民食國家糧食者訓此蓋庶人在官者  
與

若食不能人二鬴則令邦移民就穀詔王殺邦用

殺所  
界反

注就穀就都鄙之有者

凡邦有會同師役之事則治其糧與其食

注行道曰糧糒也止居曰食米也

大祭祀則共其接盛

注接讀為一扱再祭之扱扱以授舂人舂之大祭祀之穀藉田之收藏於神倉者也不以給小用

疏廩人兼掌御廩藉田之収

舍人掌平宮中之政分其財守以灋掌其出入

注政謂用穀之政分其財守者計其用穀之數分送

宮正內宰使守而頒之也

凡祭祀共簠簋實之陳之

注方曰簠圓曰簋盛黍稷稻粱器

疏言凡祭祀則天地宗廟大小祭祀皆有簠簋簠盛稻粱簋盛黍稷但外神用瓦簋宗廟當用木簋簋皆受斗二升

賓客亦如之共其禮車米芻米芻禾

芻姜呂反又音呂

注禮致饗餼之禮

喪紀其飯米熬穀

飯扶晚反  
熬五羔反

注飯所以實口君用梁大夫用稷士用梁皆四升熬穀錯于棺旁所以惑蚍蜉喪大記曰熬君四種八筐大夫三種六筐士二種四筐加魚腊焉

疏知君飯用梁大夫用稷士用梁者據喪大記沐時所用但飯米沐米與重高所盛米皆同

以歲時縣種秬之種以其王后之春獻種

縣音  
玄

注縣之者欲其風氣燥達也春王當耕于藉后則獻

其種

掌米粟之出入辨其物

注九穀六米別為書

疏九穀黍稷稻粱苽大豆六者皆有米麻小豆小麥三者無米故云九穀六米

歲終則會計其政

注政用穀之多少

倉人掌粟入之藏

注九穀盡藏焉以粟為主

疏粟是五穀之長謂稷

辨九穀之物以待邦用若穀不足則止餘澍用有餘則藏之以待凶而頒之

注止猶殺也殺餘法用謂道路之委積所以豐優賓客之屬訓餘恐殺字之誤止殺法用謂國家用穀或大事殺或小事止蓋法用不當但取委積一事且遺人所掌若老孤羸阨之屬在常時猶賙之況凶年乎

凡國之大事共道路之穀積食飲之具

注大事謂喪戎訓委積猶言委而積之也穀有餘則藏之也

司祿

關

司稼掌巡邦野之稼而辨種稂之種周知其名與其所宜地以為灋而縣于邑閭巡野觀稼以年之上下出斂灋

注斂法者豐年從正凶荒則損若今十傷二三實除

減半

疏云十傷二三實除減半者十傷二三餘有七八就七八為實在仍減半不稅於半內稅之

掌均萬民之食而賙其急而平其興

注均謂度其多少興所徵賦

疏均減取多者給其困者

春入掌其米物祭祀共其盛盛之米

疏器實曰盛黍稷稻粱麥菰是也在器曰盛簋簠



是也

賓客共其牢禮之米

注謂可以實筐筥

疏下別言饗食則此牢禮謂饗餼之米云實筐筥  
知非車米者車米多蓋出於民稅若禹貢所云五  
百里米是也

凡饗食共其食米

注饗有食米則饗禮兼燕與食

疏燕禮無食米食禮無飲酒饗禮兼有米酒

掌凡米事

饌人掌凡祭祀共盛

注炊而共之

共王及后之六食

注六食六穀之飯

凡賓客共其簠簋之實

注謂致殮饗

疏知是飧饗者以下云饗食亦如之

饗食亦如之

豪人掌其外內朝冗者之食

冗玉篇如勇切  
廣韻而隴切

注外朝司寇斷獄弊訟之朝內朝路門外之朝

疏天子三朝路寢庭朝圖宗人嘉事太僕掌之路

門外朝是常朝司士掌之外朝在臯門內庫門外

朝士掌之冗散也散吏上直不歸家食豪人共之


若饗者老孤子士庶子共其食

注士庶子卿大夫子弟宿衛王宮者

疏春享孤子秋食耆老及士庶子

掌豢祭祀之犬

訓不言何神則凡祭皆用犬矣



周禮纂訓卷八